

Namminersorlutik inuussutissarsiorniarlutik aallarteqqaat pillugit Akileraartarneq pillugu Isumalioqatigiissitap misissuisariaqarnera pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Akitsinnguaq Olsen, Siumut)

Akissuteqaat

(Aningaasaqarnermut Naalakkersuisoq)

Apeqquteqaat qulaani taaneqartoq aallaavigalugu oqallinnissamut Inatsisartunut ilaasortap Akitsinnguaq Olsen, Siumumeersup siunnersuutaanut qujallunga siunnersuummut oqaaseqaatit makku ilanngunniarpakka.

Naalakkersuisut siunnersuuteqartumut soorunami isumaqataapput namminersorlutik inuussutissarsiortut pitsaanerpaamik atugassaqartinneqartariaqarmata.

Taamaammat aamma Naalakkersuisut Akileraartarnermut Atugarissaarnermullu Isumasiolioqatigiissitaata suliassiissutaanni piumasaqaataanniippoq aningaasaqarnikkut nammineq napatissinnaanerup anguniarnissaa pingaarnertut anguniakkanut ilaassasoq.

Akileraartarnermut Atugarissaarnermullu Isumalioqatigiissitaq qaammammi matumani kingusinnerusukkut nalunaarusiami ilanngussanik saqqummiussaqaassaaq, tassanilu inassutigineqartut siulliit takuneqarsinnaassallutik.

Kisianni tamatuma saniatigut oqallittoqarnissaanut qilanaarpunga, ataatsimiinnermi Inatsisartut ilaasortaasa siunnersuutaat isumassarsiaallu Akileraartarnermut Atugarissaarnermullu Isumalioqatigiissitamut ingerlateqqissinnaassagatsigit.